

SOUTH SEA EVANGELICAL MISSION

238.3 SOU

MOORE COLLEGE
LIBRARY

MOORE THEOLOGICAL COLLEGE LIBRARY



3 2042 10014551 9

South Malaita Question Book

1931

Mui helui Wala.

(TEXTS.)

1. Taena *naini* ko sulu isulia ahutana mu haatolana, tae ko tataro ana *na* taataa leu mola, *ne* e dau walana oto ana ahuteni.
JAMES 2 : 10.
2. Kira mani orahaala oto, na kira pulo saasala ana manikuluhaana God.
ROMANS 3 : 23.
3. Inoni kei oraorahaa maurihaana kei mae.
EZEKIEL 18 : 4.
4. Waaitana orahaa maena ena : tae maurihe huu nii suune a God ena ilalo ana Christ Jesus a Lord ikie.
ROMANS 6 : 23.
5. God emanata diana hunie walumalau hulaana e maaia Kalena taataa *mela* moutei, hunia taena *naini* ko hiiwalaimoli ana kei suuri iaa, tae kei helesie maurihe huu.
JOHN 3 : 16.
6. A Christ Jesus e lae mai laona walumalau huni haaurira muini e orahaala.
1 TIMOTHY 1 : 15.
7. Maholo kia oraorahaala ue, Christ e mae honotaka.
ROMANS 5 : 8.
8. Omu kei hei hute lou . . . hute ana Spirit.
JOHN 3 : 7, 8.
9. Omu ke onisae, omu ke aliiu oto, uri huni usuri asilana mu orahaa iomu ke lae oto.
ACTS 3 : 19.

10. Oke hiiwalaimoliana Lord Jesus Christ na haaurlimu oto.

ACTS 16 : 31.

11. Tae maholo kira hiiwalaimoli kira esi baputaesi, mu *mane* na mu keni noone lou.

ACTS 8 : 12.

12. Ana hiiwalaimoline ko lae ani sae huni odotaine : na haahoulana ko lae ani wawa huni maurihe.

ROMANS 10 : 10.

13. Aena urinena ana *naini* ko io oto ilalo ana Christ, *ne* haaholana haalu oto monena : muola holaii nao e tapaliu *mano* oto, lio kau, kira si nei ola haalu.

2 COR. 5 : 17.

14. Lio kau, Noko nanauhi lauae oto mai; oke hele *nainedi* ana leune o akaurisie oto, *mane naini* e laue rorodara ioe.

REV. 3 : 11.

Sulie mui helui wala,

1. Oke haaronoau ana na leu *ne* a God e unue malaana kia ko tataro ana na taataa mei wala mola, na kia dau walaka oto ana ahuteni?

Taena *naini* ko sulu isulia ahutana mu haatolana, tae ko tataro ana na taataa leu mola, *ne* e dau walana oto ana ahuteni.

JAMES 2 : 10.

Na taa ni “ahutana mu haatolana”?

Ahutana mui erena *ne* a God e unue uri kolu ke hele isulii.

2. Enite inoni kira orahaa?

Kira mani orahaala oto, na kira pulo saasala ana manikuluhaana God.

ROMANS 3 : 23.

3. Na taa ni manolana mala oraorahaa?

Inoni kei oraorahaa maurihaana kei mae.

EZEKIEL 18 : 4.

4. Na taa ni waaitana orahaa?

Ana waaitana orahaa maena ena : tae maurihe
huu nii suune a God ena ilalo ana Christ Jesus
a Lord ikie.

ROMANS 6 : 23.

5. Uri taa o manatainie a God e manata diana huni
kolu?

God e manata diana hunie walumalau hulaana e
maaia Kalena taataa Mela moutei, hunie taena
naini ko hiiwalaimoli ana kei suuri iaa, tae kei
helesie maurihe huu.

JOHN 3 : 16.

Alahuteinilana “walumalau” ni na taa?

Ahutana mu inoni ana hanue mai iano.

Na alahuteinilana “iaa” ni na taa?

Kei mae na kei lae la hell.

Na “maurihe huu” ni na taa?

Iona ana maurihe haalu tai leni oto huu.

6. A Jesus e 'o'o'o tai leni, esi siho mai iano
hunitaa?

A Christ Jesus e lae mai laona walumalau huni
haaurira muini e orahaala.

1 TIMOTHY 1 : 15.

7. E uritaa a Jesus kei haaurira kira orahaa?

Maholo kia oraorahaala ue, Christ e mae hono-
taka.

ROMANS 5 : 8.

8. E uritaa ni kolu kei nei memela a God?

Omu kei hei hute lou . . . hute ana Spirit.

JOHN 3 : 7, 8.

9. Na kolu kei ue noone?

Omu ke onisae, omu ke aliiu oto, uri huni usuri
asilana mu orahaa iomu ke lae oto.

ACTS 3 : 19.

10. Uri ana kolu kei aliiu *maania* orahaana, kolu kei
mauri i nunuhaani?

E haike, a God e teuri :—Oke hiiwalaimoli ana
Lord Jesus Christ na haaurilemu oto.

ACTS 16 : 31.

11. Kolu hiiwalaimoli oto, hoe, kolu kesi ue heipuri?

Maholo kira hiiwalaimoli kira esi bapu-
taesi, mu *mane* na mu keni noone lou.

ACTS 8 : 12.

Baputaesi kei haamauri kia?

E haike.

Kolu ke ue holainao, oto kolu kesi baputaesi
haipuri?

Kolu kei hei hute lou.

Aena nataa ni o sare baputaesi?

Aena ana ineu tootoolana Jesus, na nou sare
tolaisulia walana.

Na taa ni oko haamalaa ana maholo oko bapu-
taesi?

Haahouleinie ineu tootoolana a Christ inaoda mu
inoni.

Baputaesine haamalalana na taa?

Maena na taelaine.

E uritaa ni e haamala maena?

Kia suu la wai, ni haatainie kie mae, na haitoli
laka e lae oto peie Christ.

E uritaa e haamala taelaine?

Kia mamanu poi *maania* wai, ni haatainie kia taelai lou ni luluiisulia na maurine haalu.

12. Aena nataa ni kie ke haahoulei inaona mu inoni, uri ikie tootoolana a Christ?

Aena ana a God e teuri :—Ana hiiwalaimoline ko lae ani sae huni odotaine : na haahoulana ko lae ani wawa huni maurihe.

ROMANS 10 : 10.

13. Na taa a God e unue sulie na haaholana haalu?

Aena urinena ana naini ko io oto ilalo ana Christ, ne haaholana haalu oto monena : muola holai nao e tapaliu mano oto, lio kau, kira si nei ola haalu.

2 COR. 5 : 17.

14. Na taa ni a God e heiholotai ana, uri ana kia ke io susu oto?

Lio kau, noko manauhi lauue oto mai, oke hele nainedi ana leune o akaurisie oto, mane naini e laue rorodara ioe.

REV. 3 : 11.

Awala Haatolana.

(TEN COMMANDMENTS.)

God e unue mui wala ie e teuri :—

1. Ineu a Lord God ioe, mane o neineie na god aopa inaoku.
2. Mane o lolodoa namua na nunui ola sulia walutana na ola . . . mane o popouruuru hahira, wa mane o haahaasakara.
3. Mane o sasai teuteu ana satana Lord God ioe.
4. Oke amasitoo ana dine ni mamalo huni haamaaie.
5. Oke haamau ana amamu na nikemu.

6. *Mane o horohoro.*
7. *Mane o maimesi.*
8. *Mane o pelipeli.*
9. *Mane o gelu wala eroero ana auhenue ioe.*
10. *Mane saemu e hanahanalie na numa auhenue ioe,
mane samu e hanahanalie na hua auhenue ioe,
. . . . wa taena na ola ana tootoolana.*

Dolosi Alamai Awalai Haatolana.

1. *Sailana mui wala ienini na ta?
Awala haatolana wa na lo.*
2. *Atei e unue mui haatolana ie?
A God.*
3. *Itei?
I tolona Sinai.*
4. *Kiratei ni e unue hunire?
Hunie a Moses na komu a Israel.*
5. *Aena na ta, God e niie mai na lo ienini?
Ni haatainia orahaana mu inoni.*
6. *Na inoni e sulu isulie mui haatolana ie kau?
Tae a Jesus haliite.*
7. *Alahuteinilana na lo, e urihana e rua mei ola,
na mui ta?
Ironunu a God na totoho a God.*
8. *Na mui ta oko lio odoie la ironunu ienini?
Orahaa laona saeku.*
9. *Mala uri oko totohoa inoni ana totoho a God,
e urita?
Kira mani orahaala na kira pulo sasala ana
manikuluhaana a God.*

Sulie haaholana a God e gaoi holai nao.

(THE CREATION.)

1. Atei e haahola ahutana moola?
Ana aehotalana God e haahola iteni na mai iano.
2. God e haaholai ana nataa?
E ere mola ana walana, oto ahutana moola e io
oto i talana.
3. Enite heidine a God e haahola "ileni na mai
iano" sulie?
E ono heidine.
4. A God e ere uritaa ana asune ineie?
God e leesie ahutana moola e asuie na lio kau,
e diana liutaa.
5. A God e ue ana hiune na heidine?
E mamalo.
E ue ni kolu ko mamalo ana etana na heidine?
Aena ana Jesus e taelai ana haidine neena, na
mui Christian holai nao kira loko ana, hunie
Neune ni seulehi a Lord, na Spirit Maai e siho
noone ana.
6. God e asu uritaa ana mane?
God e sauneinie mane sulie marana uraana ano-
loho ana makano.
7. God e saunei uritaa ana keni?
E haamaahue mane, oto e taasie naeta suli i
paraparaana.
8. God e uara ne kira esi too manoda?
E uuhi sulie galusudarue ana mei mano ni
meurihe.
9. Satadarue mane na keni holainao ni atei?
A Adam na a Eve.

10. A God e neirarue itei?
La hohola i Eden.
11. Kira saesaediana?
Siue.
12. Aena nataa?
Aena ana orahaa haike, irohaana haike, saekotana haike maena haike.
13. Naeta ai God e teuri :—"Mane o nanaa," na ai uritaa?
Ai ana manatainilana dianana na aelana.
14. Atei e sare heliwala ana asune a God?
A Satan.
A Satan na akalo?
E haike, spirit aela ne ko eroeroa mu inoni ana hanue ie, kira ko paloa satana mui akalo; na amada wa na takihada haike, ola a Satan e usuneinie mai.
Satana a Satan e urihana nataa?
Na haline.
15. E lae mai mala na taa kena Eve?
Mala na maa.
16. E haaolaa a Eve huni ke ue?
Ke heitohea a God.
17. Oto a Eve e ue?
E naa hohoi ei oto e niie lou ana Adam.
18. Mano, Adam na Eve kirarue uritaa oto?
Kira orahaa oto.
19. God e haaletehira uritaa?
E niie asune e asa hunirerue, sapesalune, maelaa na maena.

20. Hei holotaine uritaa ni a God e niie?
Kei usuneinie na mane huni ke wailia a Satan.
21. E unue satana a maena odoire?
Haike, tae kolu saaia ineie oto a Jesus.
22. Lae lae a Adam na Eve kire too mela, ohe kire
orahaa noone?
Siue.
23. Aena ana e ue?
Aena ana amada na nikada kire orahaala.
24. Satada memela a Adam na Eve holainao, kiratei?
A Cain na a Abel.
25. Maholo a Cain na a Abel sare paloa a God, na
mui taa ni kirarue tolei?
Cain e tolea huehuana ai na a Abel e tolea na
lamb.
26. E ue a God e saemano hahie gaoolana a Abel?
Uri ana e heimanie Jesus na Lamb a God.
27. E ue a God kaa aala hahie gaoolana a Cain?
Aena ana tolea muola ana asune ineie na haa-
ahesilana apu e aiaa.
28. Oto a Cain e ue?
E saewasu hiitoo, oto e saunie a Abel.
29. Laelae walumalau e honu ana inoni, kira ue?
Kira orahaala liutaa.
30. God e haaletehire uritaa?
E toliasie ewe paine e tahe hahie ahutana hanue.
31. Ahutana mala meni mae mano?
Haike.

32. Kiratei e mauri?
Noa na tatano ineie.
33. Kire mauri uritaa?
God e haraie a Noa hune ke asuie na haka paine
satana na Aak.
34. Aak neena e haamalaa atei?
A Jesus.

Sulie iolana a Jesus Christ laona walumalau.

(LIFE OF JESUS.)

1. A Jesus e holai ooo itei kau, oto esi siho mai la
walumalau ie?
Peie God ileni.
2. Maholo Jesus e siho mai urei leni, e hute itei?
I Bethlehem.
3. Atei ni nikana?
A Mary.
4. Amana atei?
A God.
5. Poro a Mary atei?
A Joseph.
6. Kiratei holai lae mai leesie a Jesus?
Mui kakali sheep.
7. Atei e haaronora uri Jesus e hute?
Na angel.
8. Nataa ni angel neena e unue?
Mane omu meumeu : ana lio kau, noko tarohainie
huniomu tataroha diana ana ilenimaena liutaa
kei oa oto nana ahutana mala : ana ini ni
Haauri e hute mai siiri huniomu ineie
oto a Christ a Lord.

LUKE 2 : 10-11.

9. Kiratei lou kire lae ni haapainaa a Jesus?
Mui mane saenanau.
10. God e haatainie tala hunire uritaa?
E usuneinie na hoi heu.
11. Maholo kira hule odoie a Jesus, kire ue?
Kira nii ola nana na kire pouruuru hunie.
12. Atei ni e sare saunie a Jesus?
A Herod.
13. E ue oto kaa saunie a Jesus?
Aena ana a God e haaronoa a Joseph hune ke
tolea a Jesus hai Egypt (Ijipi).
14. Maholo a Herod e mae oto, a Joseph esi tolea a
Jesus itei?
I Nasaret.
15. E asu ana na asune uritaa i Nasaret?
E asu peie a Joseph ani oline.
16. Enite halisi oto ana Jesus, maholo e lae maanie
i Nasaret?
E olu awalai helisi.
17. Nataa ni e gaooa sulie e olu helisi, purine e lae
maanie i Nasaret?
E lae hailiu pei asune diana, na e haahaausulie
mala sulie a God.
18. Maholo e lae maanie i Nasaret, e holai lae itei?
Takoie wai paine, i Jordan.
19. Huni taa?
Huni ke baputaesi.
20. Atei e baputaesi ana?
John Baputisi.

21. Atei e siho urei leni hahie a Jesus?
A Spirit Maai.
22. Atei e ere urei leni?
A God Mamaa.
23. Na taa ni e unue?
Kaleku ni ie mane maai ineu, nou lai lio sae-
tooana.
24. Uri Spirit Maai e tolea a Jesus takoie hanue sala
huni-taa?
Huni a Satan ke malaahona ana.
25. Enite heidine kaa nau oto?
E hai awalai hei atowa na e hai awalai hei rodo.
26. Maholo a Satan e malamala-ahona-ana, Jesus e
ere talihe uritaa?
E ere ana mui wala a God (naihi ni ohona a
Spirit).
27. Maholo a Jesus e laelae hailiu sulie asune diana,
kiratei ni e tolera peie?
Mui gaaronoisuli.
28. Huni taa?
Ni haausulira.
29. Kiratei gaaronoisuli e holai soire?
James na John Andrew na a Peter.
30. Ikire na mala uritaa?
Mala ana waisinana.
31. Na taa ni a Jesus e unue hunire?
“Lulusulieu na nekei asuiomu huni weeweesi
inoni.”
32. Enite gaaronoisuli a Jesus e siohilisire huni
hurulaa?
Awala mana rue.

33. Atei ni e lae mai kekena a Jesus i rodo?
A Nikodimas.
34. Na taa ni a Jesus e unue hunie a Nikodimas?
Okei hei hute lou hute ana Spirit.
35. Inoni "kei hei hute lou" ipuri ni uritaa?
Ineie ke hiiwalaimoli ana Jesus Christ.
36. E uritaa kolu manatainie Jesus e nei God?
E haahola ahutana muola.
Inei ana ahutana mui henue.
E manatainie ahutana muola.
37. Maholo e nei inoni, na mui taa ni e gaoi ni
haatainie nanamana ineie?
E dau hui-huite.
38. Mui hui-huite urita ni e dau?
E haaurire maemaeaa, haaholoa na mawasideni,
E haanaure e lima sinola inoni, taelainire
muini e mae oto, muini e loku ni laelae lou,
haaliore ulu, mui punu ni rorono na mui geu
ni ere-ere lou.
39. Kiratei ni a Jesus e taelainire maanie maena?
Pule a Jairus, mau na naao na a Lasarus.
40. Jesus e haarohua mawasideni na naho uritaa?
E teuri, "Oke rohu, oke noto, oto esi lae mola
wai neie holaa mae."
41. Maholo a Jesus e haanaue a lime sinolai mane,
enite hoi bread e oo ana?
E lime ata hoi bread, na e ro hoi ie.
42. Maholo e haanaue e hai sinolai mane, enite hoi
bread e dau?
E hui hoi bread na mui kele hoi ie kaa hune ike.

43. E uritaa ni kolu manatainie a Jesus e nei inoni maala e God?
E maamaahu, e *nauneu*, e *ileilenimae* na e *sae-sae*huu mala, *ikie*, mala-mala-ahona-ana e *lae-lae*, e *hiohiolo*, e *sasare* ino na e *weo-weo*.
44. Laelae e hule ana maholo ni mae a Jesus, e lae itei?
I Jerusalem.
45. Na mei taa oretalana a Jesus e haausulie mui gaaronoisuli ineie ana, oto esi mae?
Naune ni Seulehi a Lord.
46. E unue kire ke ue?
Omu ke *naue* bread ienini na omu ke inohie waeni ienini ani amasitona aku.
47. Na taa ni bread e haamalaa?
Sapena a Lord *ikie* a Jesus Christ e makaka honotaka.
48. Na taa waeni e haamalaa?
Apune a Jesus e ahe honotaka.
49. Lae hule i *nenite*, kolu ke hele sulie *naune* ie?
Hula ana kei elihoi lou mei.
50. Atei e geloa a Jesus?
A Judas.
51. Atei e taatei *neinie*?
A Peter (Pita).
52. A Naohai Priest e haatolaa Jesus itei?
Kekena a Pilate (Paelate).
53. Na taa ni mu inoni oraorahaa kira gaoa ana Jesus?
Kire haahaamasi ana, kire *nivisuhie* na kire *hide-hidelie* na kire ko neie na rorodara ani walo kaukeu i geune.

54. Kire saetooana uri a Paelate ke ue?
Rapu talenasie ilenine pou pou.
55. Oto nataa a Paelate e unue?
Nou kaa lio tooana na mei tataalana ana, neke
toliasie.
56. Ahutana mala kire ere uritaa?
Rapu talenasie ilenine pou pou.
57. Oto kire rapu talenasie ilenine pou pou itei?
I Kalvari.
58. Atei kire saunire lou urine peie a Jesus?
E ro mane talei horo.
59. Na taa God e gaoa i upui atowa?
E rodohono hahie ahutana hanue sulie e olu
maholoi sato.
60. Nataa ni a Jesus e holai unue oto esi mae?
E mano oto.
61. Nataa ni e mano?
Asune e siho mai urei leni huni ke gaoa.
62. Na asune uritaa e lae mai huni ke gaoa?
Ni tola ilenine na haaletena ana mui orahaana
ikie.
63. Atei ni e heitolie a Jesus?
Joseph ni Aramathia.
64. Enite heidine ni a Jesus e eno laona kiligeu?
E olu heidine.
65. Haidine uritaa ni a Jesus e taelai ana?
Sunday i mahuohuo.
66. Atei e holai leesie?
Mary Magdalene.

67. Enite heidine ni a Jesus e haatai hunire mui gaaronoisuli ineie?
E hai awalai heidine.
68. Maholo a Jesus kaa oli ue taileni, nataa ni e unue hunire mui gaaronoisuli ineie kire ke gaoa?
Omu ke laehie ahutana walumalau, omu ke houleinie tataroha diana huni taena na ola kira haaholaa.
69. Jesus e tahelai ileni uritaa?
E tahelai ura ana gau toloa i Olives, na mei uru e tolea oto taau maanie maada.
70. Maholo a Jesus e tahelai, nataa ni mui angels kire unue?
A Jesus ienini tahelailana esi keke lae taau maani omu tai leni, ne kei oli lou mei mala omu leesie e lae tai leni ie.
71. Heiholotaine uritaa nea Jesus e unue hune ke oli lou mei?
Noko hei lae lou mei, na nesi tarakoni omolu kekeku.
72. Atei ni a Jesus e heiholotainie ni usuneinie mei huni ke haausuli kie?
Spirit Maai.
73. Na asune uritaa ineie ko gaoa huni kie?
Ko niie maurihe huni kie na ko haausuli kie huni haiheitelie a Christ.
74. E heiholotai huni iona itei?
Laona saeda mu inoni a Christ.
75. Haidine uritaa a Spirit Maai e siho?
Haidine Pentecost.
76. Haidine neena i nenite?
Awala heidine i purine a Jesus e oli tai leni.

Rihuneine a Lord.

(THE LORD'S PRAYER.)

Maholo a Jesus e area God ana *naeta leu, ne naeta ini* ana mui gaaronoisuli *ineie* e teuri hunie, Lord oke haasaa~~ie~~mi noone ani *arenaine*

Oto e teuri hunire, Maholo omu ko area God, omu ke teuri.

Mamaa iemi ini *ileni*, Satamu ke maai. Alahana ioe ke lae mai. Moola saemu eni deuleni *ne* paolani ke lae oto, iano ileu mala oto *ileni*. Da mai siiri huniemi mui neulaa ke adona siiri. Na oke saeasie huniemi mu roroana iemi, mala emi ko saeasi roroana hunie mala e haaroroaire huniemi. Mane o tole emi hunie malaahonana, Oke haauriemi mania orahaala. Ana o tooana alahana, na nanamana, na manikuluana oto di oto di. Amen.

Sulie Arenaine a Lord.

1. Aena nataa ni kolu ko harainie mui *erena* ie ana Arenaine a Lord?

Aena ana a Jesus e haasaaire mui gaaronoisuli *ineie* ani.

2. Arenaine nada atei ni ie?

Mui gaaronoisuli a Jesus.

3. Nataa ni gaaronoisuli?

Mui inoni kire nunutoo ana Jesus na kire ko luluiisulie.

4. God e Amada ahutana mu inoni?

Haike, e Amada muini kire hei hute lou haliite.

5. Nataa "*Alahana ioe ke lae mai*"?

Kolu saetooana God kei King.

6. Nataa ni, "Moola saemu eni deuleni ne gaolani ke lae oto iano ileu mala oto ileni?
Kolu saetooana ahutana mu inoni ke sulu isulie saena a God, mala mui angel tai leni.
7. Saailana "mui neulaa ke adona siiri," e urihana nataa?
Neulaa huni sape na neulaa huni maurihaai.
8. "Mane o tole emi huni malaahona" eurihana nataa?
Mane o tole emi hunie na leu a Satan kei wae-liemi ana.
9. "Amen" e urihana nataa?
Alahahine : mala uri, lou, moola saemami e toohii otona.

Hiiwalaimoline.

Mu ola kia ko Hiiwalaimolia.

(THE CREED.)

Nou hiiwalaimoli ana God a Mamaa hahuana nanama.
 A Haahola ileni na mai i haha;
 Na ana Jesus Christ, taataa Mela moutei ineie
 a Lord ikia,
 E lodo ana Spirit Maai.
 E hute ana a Mary keni raorii,
 E siohaa i melutana Pontius Pilate,
 Kire rapu lakomai talenasia ilenine poupou.
 E mae, Kira aoria.
 E lae i Paradise.
 Olune na dine e taelai maanire muini e mae oto;
 E tahelai ileni,
 Ko io oto i galogalona God Mamaa hahuana nanama;
 Kei oli mei ure taau ana na dine huni leire muini e
 mauri ue na muini e mae oto.
 Nou hiiwalaimoli ana Spirit Maai.
 Soihaadaine Maai ana taena na hanue;

Hatana mu inoni maai;
Luhesilana mu orahaana;
Taelana mui sape;
Na maurihe hu. Amen.

Sulie Hiiwalaimoline.

1. Mui wala ie e ere sulie na mui taa?
Moola mu inoni a Christ kira hiiwalaimoli ana.
2. Enite God kire io?
E taataa.
3. Enite ola ana taataa God?
E olu.
4. Kiratei?
God Mamaa God Kale na God Spirit Maai.
5. God e Amada kiratei?
A Jesus na ahutana mui Christians.
6. God e asuie ileni na mai iano uritaa?
E ere mola and walana na mui ola e io i talani.
7. Satana a "Jesus" e urihana nataa?
Ini ni Haauri.
8. Satana a "Christ" e urihana nataa?
Ini e Alaha liutaa na King.
9. Na a "Lord" e urihana nataa?
Ini e Alaha Paine.
10. Atei ni a "Mary keni Raorii"?
Nikana a Jesus, maholo e lae mai e nei inoni.
11. Atei ni a Pontius Paelate.
Mane ni Rom, e gavana i Judea.

12. E ue ni a Jesus e lae "io"?
E haamanoa asue ineie.
13. Nataa ni "galo galona a God"?
Leu ni nanamana.
14. Nataa ni ko asu ana, maholo e io ileune?
Ko kinataini kie *maanie* domune.
Ko eitanai huni kie.
Ko dau akau ana na leu talaka.
15. Nataa ni a Jesus kei holai gaoa, hoe, kesi lae
mai ni leire mu inoni oraorahaa?
Kei lae mai holai nao, ni tolera muini ineie.
16. Atei ni Spirit Maai?
Spirit a God.
17. Nataa ni "Soihaadaine Maai"?
Mui *mane* na mui keni, siohilinie a Christ.
18. Enite Soihaadaine kire io?
E taataa.
19. Kiratei ni mala ana Soihaadaine neena?
Ahutana mu inoni kire hiiwalaimoli toohuu ana
a Christ.
20. Nataa ni Hatana?
Manamanatadiana na peipeilaka hailiu.
21. Kiratei "mu inoni maai"?
Mala a God.
22. Uritaa ni kie manatainie saeasilana mui orahaana
ikie e lae oto?
Aena ana a God e teuri hunie mala kire nunutoo
ana Jesus :—"Saeasilana mu orahaa iomu e
lae oto itehulaana oto satana."

1 JOHN 2 : 12.

23. Nataa "taelana mui sape"?

A God kei taelainie mui sape maanie mu kiligeu.

24. Kiratei ni kei holai taelai?

Mui Christians : "Muini e mae ilalo ana a Christ kei holai taelai."

1 THESS. 4 : 16.

25. Oto purine na sinolai helisi kei mano, kiratei kesi taelai?

Kira oraorahaa. Oretana muini ana mala e mae.

REV. 20 : 5.

26. Kolu ke akaurisie maurihe huu uritaa?

Ani hiiwalaimoline ana Jesus Christ. "Ini ko hiiwalaimoli ana a Kale ne e hele oto ana maurihe huu ena."

JOHN 3 : 36.

O hanuie inoni nana God maanie taena na komu, na taena na erena na taena na mala, na taena na apoloa.

REV. 5 : 9.

Omu ko manata diana hunieu, omu ke sulu isulia mu haatolana ineu.

JOHN 14 : 15.

Nou heiholotai Jesus.

(O JESUS, I HAVE PROMISED.)

1. Nou heiholotai Jesus
Ni esu huu namue;
O *Mane* o Alaha,
Io susu peieu;
Nou saa roroa mau
Ioe papali ineu,
Nou saa takalo ike
Ana Okei naoku.
2. O heiholotai Jesus
Atei lae i purimu,
Kei io huu peio
Ana hanue ioe.
Nou heiholotai Jesus
Ni esu namue.
Peieu mai taraurei
Hatana ineu, loe.
3. Oke haatainie
Talahuli ana aemu,
Ni uuri lou isulio
Haamautaa au.
O soieu oto mai,
Hele suahata au;
Lae hule taane tai leni
Haurileku, loe.



